

**Uunga siunnersuut: Ilinniarnertuunngorniarfinni ilinniutit, ilinniarnernerup ingerlanera, atortussallu allat Namminersorlutik Oqartussanik tapiiffigineqarluni pineqartartut ilinniarnertuunngorniarfinni siunertanut tapersersuisuunersut Naalakkersuisunit misissuiffigineqarnissaannik nalunaarusiorneqarnissaannillu inatsisartunut aalajangiiffigisassatut siunnersuut Nalunaarusiaq kingusinnerpaamik UKA2019-mi saqqummiunneqassaaq siunissamut isigisumik pitsaassutsimik qulakkeerinninnissamut innersuussinernik imaqaassalluni.**

(Siumup Inatsisartunut ilaasortai)

### **Akissuteqaat**

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

### **Siullermeerneqarnera**

Ilinniarnertuunngorniarfimmi (GUX) ilinniutit, Namminersorlutik Oqartussanik tapiiffigineqarluni suliarineqartut, GUX-imik siunertanut tapersersuisuullutillu naleqquttuunersut pillugit Naalakkersuisut misissuueqquneqarlutillu nalunaarusioqquneqarnerat pillugu aalajangiiffigisassatut siunnersuut Naalakkersuisut qujassutigaat. Siunnersuuteqartutaaq ilanngullugu ujartorpaa, nalunaarusiaq siunissamut isigisumik pitsaassutsimik qulakkeerinninnissamut innersuussinernik imaqaassasoq.

Naalakkersuisut siunnersuuteqartut isumaqatigai, GUX-imi ilinniutit, Namminersorlutik Oqartussanit tapiiffigineqarluni suliat, ilinniarnermi siunertanut naammassinninnissaat, taamaasillutillu atuartut ilikkagaqarnissaannut iluaqutaanissaat qulakkiissallugu pingaaruteqartoq. Naalakkersuisutaaq siunnersuuteqartut assigalugit kissaatigaat, atortussat, GUX-imut ineriartortinneqartut pitsaassusaasa qulakkeerneqartarnissaat.

GUX pillugu inatsisit tassungalu oqaaseqaatit atasut aalajangersarpaat, GUX-ip pingaarnertut atuartut ingerlariaqqiffiusumik ilinniarnissamut piareersarnissaannut, kiisalu nammineq kulturit, nammineq inuiaqatigiit kiisalu nunarsuaq aallaavigalugit atuagarsornikkut inuttullu piginnaasanik annertusaanikkut tamanut ilisimasariaqartunik ilinniartitsinissaq siunertarigaa. Ilinniartitsinissamut pilersaarutit pillugit nalunaarutip ilanngullugu aalajangersarpa, fagit ataasiakkaat qanoq ilillutik inatsisip siunertarisaanik qulakkeerinneqataassanersut.

Atortussat tamarmik, Namminersorlutik Oqartussanit tapiiffigineqarluni GUX-imut ineriartortinneqartut, ilinniarnertuunngorniarfiup siunertanut tapersiillutillu naleqquttuussapput, matuma ataani fagimi ilinniartitsinermut pilersaarummik eqquutsitseqataassallutik. Tamanna ilaatigut fagimut siunnersortitigut attuumassuteqartutigut Ilinniartitaanermut Naalakkersuisoqarfimmit qulakkeerneqartarpoq.

Fagimut siunnersortit pingaarnertut suliassaraat, ilaatigut fagip ineriartornera malinnaaffigissallugu tapersersussallugulu kiisalu ilinniartitsisut attaveqarfigisassallugit.

Fagimut siunnersorti sammisamut ilisimasaqarpoq, fagimut ataatsimut isiginnilluni kiisalu fagip iluani susoqarneranik ilisimasaqarluni. Saqqummersitsisoqarnissaanut atatillugu fagimut siunnersorti ilanngunneqartarpoq, atortussap eqqarsaatigisaq fagimut naleqquttuuneranut naliliinermi, matuma ataani ilinniartitsinermi pilersaarummik eqquutsitsinermut qanoq annertutigisumik tapiissuteqarnersoq. Fagimut siunnersorti taamaasilluni, atortussap sammisamut naleqquttuuneranut qulakkeerinnittuuvoq.

Ilinniutinik sananermi Ilinniartitaanermut Naalakkersuisoqarfik suliniummut aqutsisutut aaqjissuisutullu atuuttarpoq. Naalakkersuisoqarfiup aallarnisaalluni suliniummik nassuiaat, atortussamik eqqarsaatigineqartumik nassuiaasoq akuersissutigisarpaa, soorlu naalakkersuisoqarfik atortussaq pillugu ingerlaavartumik oqaaseqaateqartartoq kiisalu naggataagut akuersissuteqartarluni. Atortussanik eqqarsaataasunik akuersinermut kiisalu atortussanik inaarutaasumik akuersinermut piumasaqaataavoq, atortussap GUX-imi anguniakkamut eqquutsitsinissaa, matuma taani ilinniartitsinermut pilersaarummik eqquutsitseqataanissaa, kiisalu Ilinniarnertuunngorniarfimmi allanneqarsimasunik perorsaanikkut ukkatarinniffinnik ilanngussinissaa. Taamaasilluni akuersissuteqartariaatsimik pilersitsisoqarpoq, ilaatigut sammisap imarisaanik pingaartitsiviusumik, atortussat Kalaallit Nunaanni pissutsini kulturimilu aallaaveqarnissaannik kiisalu oqaatsit allat atorlugit perorsaanikkut atortussanik allanillu ilanngussisoqarfiusartumik. Tamakku tamarmik siunertaraat, atortussanik ilinniartut ilinniarnernanni aamma atuagarsornikkut ineriartorneranni tapersersuisumik saqqummiussisoqartarnissaa.

Naalakkersuisut nassuerutigaa, [www.iserasuaat.gl](http://www.iserasuaat.gl)-imi ilinniutinik saqqummersitsineq pillugu paasissutissani toqqaannartumik eqqaaneqanngitsoq, tamanna GUX-imi siunertamut tapersersuisuussasoq attuumassuteqassallunilu, massa nittartakkami piumasaqaatit allatorneqarsimasut toqqaannanngitsumik tamatuminngarpiaq qulakkeerinnikkaluartut. Ilanngullugu nittartakkami paasissutissat toqqaannartumik nassuiannngilaat atortussanik akuersissuseqartariaaseq. Taamaattumik Naalakkersuisut qulakkeerniarpaat, paasissutissat taakku nittartakkami ersarissumik allassimassasut, taamaasilluni tamakku pillugit nalornisoqassanngimmat.

Maanna saqqummersitsinermut atatillugu suliaqartariaatsip, ilinniartitsisut atuakkiortumut siunnersuisutut ilaatinneqarnissaannut periarfissittarpai, saqqummiussinissaq sioqqullugu atortussat ilinniartitsinermi misilinneqartarnerisigut, kiisalu atuakkiortut arlallit saqqummersitsinermut ataatsimut suleqatigiittarnerisigut il.il. Periarfissat taakku siunertaraat atortussanik, ilinniartitsinermut attuumassuteqarnerusunik ineriartortitsinissaq, taamaasillutillu aamma pitsaassutsimik qulakkeerinninneroqataasinnaallutik.

Aalajangiiffigisassatut siunnersuummi kissaatinut atatillugu Naalakkersuisut taamaasillutik nalilerpaat, ullumikkut qulakkeerneqareertartoq, atortussat Namminersorlutik Oqartussanit tapiissuteqarfiusumik GUX-imut ineriartortinneqartartut, ilinniartitaanermi siunertarisamut eqquutsitsisuusut, attuumassuteqartuusut kiisalu pitsaassusai qulakkeerneqareertartut. Ilanngullugu nalilerneqarpoq, misissuinissami kiisalu nalunaarusiornissami siunnersuutigineqartumi, ilinniutinik GUX-imut ineriartortitsinermut ukiumut aningaasaliissutitut illuartinneqartartut nalingannik aningaasartuuteqartoqassasoq.

GUX-imut saqqummiussanik sulinermi ersarissuusoqarnissaa Naalackersuisut kissaatigimmassuk, qulaanilu paasinnineq pillugu, allannguutissatut siunnersuut tullittooq Naalackersuisut saqqummiuppaat:

***” Namminersorlutik Oqartussanit tapiiffiqineqartunik GUX-imut ilinniutinik suliaqartarnermut atatillugu suleriutsumik nassuiaasumik, Inatsisartunut ilisimatitsissummik erseqqissumik Naalackersuisut suliaqarnissaat pillugu Inatsisartut aalajangiiffiqisassaattut siunnersuut. Ilanngullugu Naalackersuisut peqquneqassapput GUX-imut atortussanik suliarineqartunik/suliarineqarsimasunik ukiumoortumik Inatsisartunut ilisimatitsissuteqartassasut. Ilisimatitsissut UPA2019 sioqqullugu saqqummiunneqassaaq.”***